

ديوان

يسقط يسقط حكم المرأة

بقلم
سعيد عمر أبو برين



يسقط يسقط حكم المرأة



المقدمة

كانت معشوقة الرجال ولم تزل أميرة علي العرش علي مر العصور
والأزمنة فنظمت لها الأشعار والدواوين واشتعلت من أجلها أشرس
الحروب وصار عشاقها مشاهير الزمان فكان مجنون ليلي أشهر العاشقين
رغم وصفه بالجنون في حبها الذي وهب له أدبًا تميز به عن غيره.

وكان حبيب عبلة أشهر الفرسان في العشق والغزل بعد أن وهبه حبها
قوة وشجاعة لم تعط لغيره؛ فاستحقت قول من قال:

كانت على عهد الزمان الخالي ذات الوقار وذات كل كمال

ظل الجدار إذا رآته تراجعت معتزة في هيبة وجلال

لا شيء يفرعها هناك وإنما حرصًا على الشرف الرفيع الغالي

ولكن مع تغير الزمان والمكان صارت موضعًا للنقد أحيانًا والسخرية
أحيانًا أخرى بعد أن تخلت عن حليها وزينتها ووقارها وتزينت بما تمزق
وما تحزق.

والحقيقة أن لا حياة بدونها وستظل دائمًا وأبدًا معشوقة الرجل وموطن
هدوء روعته وسكينته ومن أجل ذلك دعونا نهتف لها «يسطع يسطع نجم
المرأة».

جمال عبد الله مصيلحي

المحامي بالنقض

يسقط يسقط حكم المرأة

يسقط يسقط حكم المرأة
تسقط كل حقوق المرأة
حق الرجل هضمينه ليه؟
بعد ما جبتوا الحق عليه

كثر حقوقها ده حياذينا
الأغلال ربطت رجلاينا
مين م المرأة راح يحمينا؟
ليه ركبتوا المرأة علينا؟
أهي بتقول مش محتاجة لينا
وانها أحسن من ميت راجل

(٢)

كنا سناجل
بالبرفان دايمًا نتبخر
كنا بنمشي طيور تتمخطر
نرجع بدري أو متأخر
مش مربوط في قفانا مؤخر
ندفع كاش .. ندفع آجل
مش مصروف دلوقتي وعاجل
كنا زي الطير الزاجل
نلف الدنيا وبحرية
من عش لعش ناخذ نظرة
لحد ما فلحظة غبية
حطينا على عش رزية
ورجلينا وقعت في الخية
أتاريه ده عش الزوجية

(٣)

يسقط يسقط حكم المرأة
حكم المرأة يا عالم غارقة
شوفوا كام زوج بينام في الطرقة
أو كام واحد حاسس منها في قلبه بحرقة
القوانين اديتهم جراً
يسقط يسقط كل تسلط
يسقط حكم المرأة الوغدة
يسقط كل نظرة بزغدة
خدها يارب شر الأخدة
يا أما تشل رجل مراتي
ما بتضربشي غير بالفخدة
وعاملة سطو عليا يوماتي
حتى الفكة كمان متاخدة

(٤)

احنا حقوقنا راحت فين؟
ضيعتوها في لمحة عين
احنا لو حنموت م الجوع
يا تساوونا زي المرأة
يا حنفضل هنا بالأسبوع
حتى لو عازب مخدوع
جاي بيطالب ليها بحقوقها
خش يا خويا العش ودوقها
أول شهر وحيروح زوقها
وعذابك راح يبقى ده شوقها
وحتبقى عربية تسوقها
وحتفضل في البيت جربوع
وحتعرف أنك مخدوع
مين حيشارك ضد المرأة

(٥)

بعد الجمعة يا ناس أنا نازل
حاخذ حقي ومش حتنازل
مش راح أنافق ثاني واغازل
مش راح أقولك ثاني يا قطة
دا أنتي برطمة
حتى في حلقي مرار بزغطة
وكل شوية ح أتلكك
ياللي البومة أصلاً شكك

شوفنا جمال موجود في الدش
وانتي حلاوتك زي المش
مش راح أخاف ومش راح أكش
مش راح أقولك ثاني معلش
مش راح أطاطي ثاني يا مراتي
وحاطط الشبشب تحت بطاطي

(٦)

لو بصيتي بنظرة كش
ح تلاقي الشبشب طار في ثواني
وساب الجسم ولبس الوش
يسقط يسقط أي كلام
ح يحط المرأة في أي أغاني
ومش راح أعاني وأقول آه ياني
مش راح أخش المطبخ ثاني
مش راح أنضف ثاني أواني
وراح أوريكي الوش الثاني
وتتعرفني على أصل الوش
كلامي بجد ماهش تهديد
بطلي شغل سيد وعبيد
حتى لو تصبينة العيد
جزمة قديمة مليانة طينة
برضه ح أخش على السجاجيد

(٧)

وانسي يا ماما أكونك ساعي
ياللي لسانك قد دراعي
ياللي قرايبك قاموا بخداعي
ياللي حقيقتك حرقت دمي
وأنا من هبلي مشيت متغمي

طلعوا صورة في يوم هبلتني
قولت ازاى مالهش خُطاب
دي بت جميلة وشكلها طاب
بس قالولي لابسة نقاب
بعد قراية في كتب الدين
فرحت في عبي وقولت أمين
مدام جميلة وعندها دين

(٨)

وجاني اليوم الموعود
والقاعة مليانة ورود
ودخلت حلمي المنشود
والفرقة ظهرت بدفوفها
وحلمي اتحقق وحشوفها
زفوها ع الكوشة بالدفة
ميلت عليها ألغي كسوفها
ريحتها جميلة قامت هافة
رفعولها الطرحة في الزفة
لقيت بضاعة تالفة وجافة
بسرعة ريقي حضّر تفة
وفي لحظة دماغي قامت لفة
وقولت ساعتها يا ليلة طين

(٩)

شكاتها يدي على ستين
شوفت حواجب متواصلين
شوفت عنوها شمال ويمين
كان اتنين كانوا متخاصمين
لادغة كمان في الره والسين
حتى صحابي لما شافوها قاموا داخين
وقبل ما يمشوا جم عزوني
الله يعينك يا مسكين
علشان عندي حسن النية
أهل مراتي ضحكوا عليا
وصورة البت لناس تانيين

(١٠)

صحي يا بت أبوكي أمين
قوليله ع العصر خلاص داخلين
اصحى يا بابا .. اصحى يا بابا
يسقط .. يسقط
يسقط .. يسقط
اصحى يا بابا أنت بتحلم
مين؟ .. أنا نرمين

كان حلم يا بابا ولا كابوس
اي والله يا بنتي كابوس
يبقى أكيد مزنوق في فلوس
يا بنتي كابوس وشيطانه لنيم
كان عنده عقدة صنف حريم
سابني نمت عملي كمين
بعد خلاف كان ع الكسوة

(١١)

قـولـت لأمـك راح أقـيـل
انـتـهـزها فرصة وجاني في كابوس
عـايشـني في كذا حلم منـيل
افـتـكر العـشـرة أسـاسـها فـلـوس
مـيعـرفـشي الـي بـينا يـساوي كـنـوز
حـول جـمال أمـك لـكـابـوس
شـبـهـها آله وناقصة تروس
حـتى البـودـي كـمان مـعـكـوس
طـب شـخـشـخ جـيـبـك يا حـبـيـبي
أنا عـنـدي سـنـتـر ودرـوس
نـعم ياخـتي؟

يا ماما يا ماما

خـلاص يا نـرمـين
يـعـني أمـك زـعـانـة عـلى كـسـوة

وانتي عايزة فلوس لدروس

مش ح أخلص من نون النسوة

بجد يا بابا كان ده كابوس؟

بابا بابا

بابا نام تاني!!



كفاح العرب

ايه اللي جرالنا ليه اتغيرنا
ليه استسلمنا كده لقدرنا
تعبننا ونمنا؟

ليه بطلنا كفاح حناجرنا
ليه بطلنا حتى ندعي فوق منابرنا
وسيبنا اليأس اتسلل بينا
ليه استسلمنا؟

لحد القدس ما راحت منا

فين المدافع جوه لسانا
فين القنابل جنب سنانا
ليه طيران البق استتنا؟
ليه ما طلّعش حتى بشنه؟
مين اللي بطل يدعي وخنّا؟

(٢)

لازم نرجع ثاني ونعود
ونعبي حناجر الأمة وقود
فين الكلام المحشي بارود
فين دعاءنا ع الصهاينة من اليهود
فين الأماني يرجعوا ثاني قروود
اعتمدنا ع الأمم وع الوعود
وراحت القدس هباء
لما فیتوا لعم سام في لحظة جاء
علشان نسينا أن الكفاح
مرهون على كتر الدعاء

لازم نحارب الصهاينة بالعزيمة
لاجل أرض القدس ترجع ثاني لينا
ولاجل نمحي المظلومية
العزيمة تكون بنية
بس نخلص في الدعاء

(٣)

مش حنسيب القدس تروح
طول م الحنجرة فيها الروح
احنا جهادنا جهاد أموات
مش ح نسيب الميكروفونات
في الندوات جوه شاشات
وحنحررها يدوب في ساعات
بس اللي معطل تحريرها
ان قالولنا العقرب مات
وطول ما كلامنا قوته شيكات
الحنجرة ح تعيش ألافات
وبالخطابة والدعاء حنذلهم
وندعي تاني يارب شتت شملهم
يارب يتم حملهم
ومهما كانوا احنا برضه قدهم

(٤)

ونفضل ندعي على الأوباش
القدس يا ناس بتروح ببلاش
حتى نسينا ماعددناش ماولولناش
علشان نمنا ولا دعناش
لازم ندعي في كل صلاة
لازم بقنا نمشي وراه
بيفكرنا بصلاح الدين
طيب الله ثراه
ونهي دعاءنا بيا الله .. يا الله
ولا نبطلش كفاح حناجرنا
ونرجع ندعي فوق منابرنا
لحد القدس ماترجع بينا
عمر الشك في يوم ما ساورنا
طول ما كفاحنا مالي حناجرنا
جيل بيكافح ايده وراه
أما النصر لابد ح يجي
طول ما بندعي في كل صلاة

فين دارنا ودوارنا

كل ما أعدي في يوم على دارنا
دمعة في قلبي بتسبق عيني
كان جوه الدار دي عمر سنييني

انطفئ دارنا ومات بالهدم
وأمي وأبويا أصبحوا نكري
نكري وراحت وسط الـردم

كام طوبة مخفية في وسط محارة
خبّت حكاويننا ما حد لمحها
جه الهدم ف لحظة غبية وقام قلعهها

(٢)

فين دارنا؟ ودوارنا؟ وزوارنا؟
في نفس المكان شريط بيمر
حـلـو بـمـر
كانت هنا موجودة النخلة
كنا نشوفها قبل الدخلة
وكانت شاهدة على ناس أصيلة وناس جاحدة

فين دارنا؟ ودوارنا؟

وفين تسبيحنا في تشط البيت؟
وتليفنا بليف النخل
والرزق كان يجي م الغيط
ولا نعرف يعني ايه الدخل
وع الرزق ده اتربيت

(٣)

ومع ان العيال بالكوم
والرزق كان جاي مفروم
ما حدش عاش فينا محروم
ومن الرضا كان بالمقسوم
غيرنا صفات المش
وقولنا زي عسل النحل
ووصفنا البصل بالفحل
وقولنا يا ريتها تدوم

(٤)

فين تاتا؟

فين تاتا؟ وأول بوسة بغتاة وأنا بحبو؟
وعطف أمي واللي جه بعدي وراح ساحبو؟
راح لأخويا حضن أمي اللي كان دافي
وفين حنان أبويا لما لقاني في يوم حافي
دخل عليا بجزمة جديدة وقال دي من باتا
ومن فرحتي كنت بنام أنا وهي مع لحافي

فين التوتة؟

فين التوتة؟ وفين توتها؟ وفين ثمرتها بحلاوتها؟
وليه حكم الهدم ليه بموتها؟
كان سابها لأحبابها
حتى لو انكسر بابها
كان سابها لينا ذكرى
تقول كان هنا بيتنا

(٥)

فين التوتة وزلعة مش محطوة؟
ورثناها من أجدادنا
وفين دستور يا أسيادنا؟
لو حد خبط على بابنا
كانت أسس ومحطوة

وعيش طازة طالع م الفرن
نعمل منه مخروطة
ولعب الكورة جوة الجرن
وديل جلابيتي مربوطة
وكام تعويرة في كعب الرجل وكام شوكة

وزعيق خالتي مبروكة
لو الكورة جت فيها
نجري بسرعة نراضيه
ولو رجعت تاني تروح ليها
تقوم وخداها تخبيها
نجيب ليها حد بتحبه
أو حد يكون قريب ليها

(7)

فین دارنا؟ وأسوارنا؟ وأسرارنا؟

ولبلابة بتتسلل على جدارنا
كل فترة تحيرنا
تطول تقوم تقصرنا
لكن في الشكل خلاصة

وكان بقرة حلابه
وغنم مطلوقة متسابة
وأخر الليل ندخلهم
خائفين من هجمة ليلية
وسحابة جاية كدابة
لا منعت عنا حرارة الشمس
ولا مطرت لغلابه

(٧)

وكام وزه وكام فرخة وكام كتكوت
وهش الكل لو كان الجمل هيفوت
في العالي مبيكشفش
والخُف بميت نبوت
ومصطبة موجودة جوه الدار
طالع منها عنباية
نازل منها عنقيد نور
وكل عنقود نجفاية
وكام دور شاي في كباية
وسهراية، وكل ليلة برواية
وأنام واسكع وأقوم مفزوع بضحاية
وعنينا في وسط النار مسحوبة
كأن الإرادة مسلووبة
مشدودة ما لها نهاية

(٨)

وحكاوي وسهاري
وقاعدين على لمبة سهاري
لمبة جاز طالع منها هباب أسود
من شريط راسه بتتشوي
يا ترى الهباب كان بيترقص؟
ولا من الحرق بيتلوي؟
ما صدق أنه طلع بره
يطفي جسمه يتهوي
وقلت أنا ايه اللي محيرني؟
بيرقص ولا بيتلوي
المهم انه كان منورلي
وقاتل الخوف جوايا

(٩)

فين دارنا؟ وفين أمي؟ وفين أبويا؟

كل اللي باقي من أبويا
نضارته.. وعصايته.. وكام نوتة
ومن أمي إيشارب أسود
وبقايا سبحة مفروطة

وفين أم أمي ستوتة؟
كانت هيئة وكانت عايئة
وعلى جدي الدلال سايقة
من كتر جمالها بتتغندر
كان بيناها بست الكل
وجميع طلباتها من البندر
دا غير يوماتي عُقد الفل

(١٠)

كبرت ستي ومات جدي
من بعده الفل مالوش ريحة
عمالة تقول يا سنين عدي
الدنيا مبقتش مريحة
وكانت يوماتي تجيب سيرته
وتحكي وتحكي وتندم
على كل دقيقة زعل منها
أو كانت في يوم سبب غيرته
وتقوله تعالى يا موت قدم
حبيبي هناك مستنيني
أمير ومستني أميرته

كانت ستي ستوتة بحدوتة تجمعنا
حدوته ممكن تفرحنا
والثانية ممكن تدمعنا
ومتشوق تزيد أكثر تسمعنا
ولو مست شقاوتنا نحس بذنب

(١١)

وآخر الليل طبلية بتجمعنا وبتسعدنا
ولو بالجنب
ده اللي أنا فاكراه من جدي ومن ستي
وقد ايه كنت بشاكسهم دلوقتي
بحس بذنب
كان المفروض في حياتهم أونسهم

فين دارنا؟ وفين احساسي بالزينة؟
وفين زغاريط أفراحها
وبكا وصويت عشان ميتة
ومرايا مكسورة ع الحيطه
كانت سنداها شقفايا
وكنيت أصحى من ستة
وأخذ من كسرهما حنة
وفوق السطح وادارى

(١٢)

واخذ م الشمس شمساية
وازغلل بيها عين قطة
تخاف منها تروح نطة
واقع م الضحك على قفايا
ما أنا حيرتها معايا
وأفوق على صوت طلق
سألت قالوا ده فرح
وبيوزعوا ملبس
وفين الزير اللي كان مكسور ومتجبس؟
وكوز مغلوب على أمره
وفي أي بق يدبس
وتحت الزير بط كتير ومتكدس
ولو هشيته كان بالمية يتشبس
خايف يخش مرة تائي يتحبس

(١٣)

فين دارنا؟ ودوارنا؟ زمن كذاب؟
راحو الحبايب وسابونا نعيش في عذاب
نعيش ع الماضي
مع الأهل والأحباب
وست كبيرة جنب الباب
حاجة سودة مركونة
محدث عامل ليها حساب
كأنها ع الحيطه مدهونة
افتكرتها تمثال متساب
نسيو يدخلوه جوه الشونة
كانوا أخواتي ساعتها شباب
قالولي دي أم أبونا
دا أنا كنت بخاف أعدي الباب
ما قالولي التماثيل مسكونة

(١٤)

لحد ما في يوم ندهتلي
اتلزقت ع الحيطه لزقة مونة
قالت متخفش يا محمد
يا واد ده أنا ستك أمونة
ماتت في صمت أم أبونا
واتمسحت الحيطه المدهونة

أنا فاكِر

أنا فاكِر يوم الاتنين كان يوم السوق
ناس رايحة وناس جاية بتتسوق
وناس بتتدوق
وناس بتبيع من دارها حاجات زائدة
وتتسوق بتمننها
حاجات ناقصة من نفس السوق

(١٥)

وناس نازلة لا بيع ولا شرا
زي الـغـرا
بتتفرج على أي جمال
اداه ربنا لمخـلـوق
وناس بياعة ومحتالة
لا إيـمـان ولا ذوق
أشكال وألوان موجودة في السوق
اللي قاعده بمشنة
واللي معاهما زبدة وسمنة
واللي بتبيع بعنيها
واللي كئيبة ونكدنة
واللي معاهما دكرين وز
واللي رايحة وجاية تهز
عمالة تترقع في لبانة

(١٦)

واللي ماشي بيتزنق
واللي ماشي بيتخلق
واللي بيقول حد يحلق
سرقوا الست الغلبانة
وبنات في اليوم ده بتتذوق
يمكن عدلها يجي م السوق
واللي بيبيع حاجات ضارة
سوق بالهمزة، وسوق بالقاف
فيه حرامية، وفيه أشراف
وبيجي في الأسبوع مرة
فين دارنا؟ ودوارنا؟ وكُتابنا؟
كُتاب القرية كان كُتاب الشيخ بهلول
وكان قدام دار عم فاتوس
كان موجود على أرض فاضية
وقامت القرية وبنات السور

(١٧)

وسقفه كان معمول بالخصوص
أما الشهر بتاع مولانا
يا إما غلة يا إما فلوس
وكان في الأكل حلق حوش
مبيرحمش وكان بيدوس
ولو نسينا في يوم نحفظ
يا ولاد الكلب محفظتوش
وكان مولانا بيندهلي
ما هو كان عارف قيمة أهلي
ياد يا محمد مخبزتوش؟
طب قـول لأمك
لاحسن أمك تنسانا
وكنت أقول ماشي يا سيدنا
يقول والفطير ياد والجبنة
والله يا مولانا أنا فاكـر

(١٨)

ياد يا محمد أنت شاطر ومذاكر
مش زي الحمار ابن أبو شاكر
يا خوفي يا واد تيجي تسيبنا
العيال دي يا واد راح تتعبنا
وكانت عصاية الشيخ بهلول
طولنا بطول
ومهما بعدنا عصيته تطول
كنت كل ما أشوفه
أموت م الضحك
بيفكرني بقدرة فول
كان جسمه كبير على راس عصفور
كنا عيال مبنقدرش قيمة العلم
وتعب الشيخ ويانا
ياما استحملنا وياما
الله يرحم مولانا
سيدنا عم الشيخ بهلول

(١٩)

في نفس المكان ذكريات
ياما حكيتهها
هنا أول كلبة ربيتها
وتوكة أختي اللي خبيتها
واختي الكبيرة الي سابت بيتها
لما حماتها سبّتها
وأول بنت حبيتها
خدتها مني وردتها
وأول نجمة حظيتها على اكتافي
وزغروطة من أمي تحيتها
فين أمي؟ وفين بيتها؟
خدو مني اللي على اكتافي
خدو نجومى مع سيوفها
واخش في حضنها الدافي
اللي كان شافي وكان كافي

(٢٠)

وألاقي أمي قدامي
ببسمتها وضحكتها
وأبوس أيدها وأقعد تحت جزمته
وأطوف حواليتها بجنتها
واحكي لها واشكي لها
قد أياه محروم منها
فين أمي؟ وفين بيتها؟ وعزوتها؟
وفين أبويا؟ وفين داره؟ وأسرارها؟
مات اللي كان ليا جداري
واللي كان ساند ضهري
دلوقتي متملكني الخوف
من بعد ضهري ما بقى مكشوف
يا طول عذابي يا طول سهري
لا أكون أذيت مشاعره في يوم

(٢١)

الله يرحمك يا
أبويا كان خفيف الدم
مكنش يحب ولا يوم غم
كان يقول لو جالك الغم
ابقى اضحك له
لو سيبتة لعقلك راح ياكله
وسد حنكه بضحكة
كنا لما نيجي بعيالنا
يقول ما شاء الله دي عيالنا
نلاقيه على طول بيسألنا
قولي يا واد انت وهيه
أطير فرد تجيني غيرة؟
كتري يا ختي التقلية
ولا العيال متغدية؟

(٢٢)

مكالوش يا حاج من امبارح
ناوليني العصاية يا ولية
ح يخلصولنا البرنية
ولا يمكن دي تكية؟
وأمي تقوله بطل ضحك
لا العيال يفتكروا دا جد
يا ريت من الواحد فيه
طب حطي يا ختي الطبلية
يا هبللة دول نور في عنيا
دا أنا بعاكس أحفادي
يمكن حد طالع ليا
راح أبويا بخفة دمه

(٢٣)

فين دارنا؟ ودوارنا؟ وزوارنا؟
وذكريات فيها أسرارنا
احنا برضه حنبقى ذكرى
بس بس بس
في حد ممكن يفتكرنا؟!
زي جيلنا؟
واحنا فوق نسمع كلامه بيساهرنا؟
بيناديننا من بعيد
يفتكرنا في كل عيد
ما افتكركش
جيل بيجري بيقول يا قرش
ما افتكركش .. ما افتكركش



دمعة في بير العبد

آه من دمعة عينك يا بني
نازلة حزينة بتقول ليه؟
ليه قتلوني من غير ذنب؟

قتلوك يا بني في بير العبد
قتلو براءتك ساعة السجد
ليه الدمعة نازلة حزينة؟
وانت لسانك ليه مربوط؟
ليه مستسلم كده للموت؟
وليه بتموت كده من غير صوت؟
كان نفسي ف صرخة تفضل لعنة
على كل قاتل واللي وراه
ليه ما صرختش يا بني بأه

دمعة عينك بتحزنا وبتألمنا
اوعى يا بني تكون بتديننا
تبقى ظالمنا

(٢)

قتلوك يا بني
ناس مش منا ولا على ديننا
ناس الدم في ايدهم حنة
وبيتباهاو بلفظ الله
له ما صرختش يا بني بآه؟

دمعة عينك بتودعنا
بس بتكوي جوه ضلوعنا
نازلة بتكسف كل دموعنا
لما بنبكي على أهواء
وانت دموعك نازلة فراق، وبتودعنا

عمر ما جه في يوم على بالنا
ولا في خيالنا
ولا جه حد في يوم وسألنا
حد يدخل بيت الله
ويقتل حد في وسط صلاة

(٣)

إلا خوارج هذا العصر
دول يا حبيبي كلاب النار
قتلوا طفولتك حسوا بنصر
كانك يابني تقاوي تثار
قتلوك يا بني في جامع الروضة
ورفعوا ساعتها الراية السوده
راية عليها نبي الرحمة
وهما قلوبهم لون الراية
ليه ما صرختش يا بني بآه؟

شوفتك يا بني في حزن أبوك
كنت بتحميمه ولا بيحميك؟
احساسى كان نفسه يخبيك
أو يركب فوقك وينجيك
ولا كلب من دول يغدر بيك
ورصاص الغدر ما يجيش فيك
ما أنت يا روى برضه ضناه
ليه ما صرختش يا بني بآه؟

(٤)

موت يا حبيبي موت واتهنى
دمعة عينك غالية علينا
بس أكيد تصرّح للجنة

يا ريتك يا بني صرخت بآه
كان نفسي في صرخة تفضل لعنة
على كل قاتل والي وراه



خلوا بالكوا من عيالکوا

قال رب الخلق لنا
المال والبنون زينة
فهل أدركنا كرم رب العالمين؟

خلوا بالكوا من ولادکوا
دول حیاتکوا امتدادکوا
بهجة حياة من حوالیکوا
خلوا الولاد تحت عنیکوا
دول زي الشجر جوه جنينة
بذرة غرستها ايديکوا
لو ما اتسقيتش في يوم بالحب
عمر طرحه ما حييکوا

(٢)

خلوا بالكوا دول بكره زادكوا
عنيكوا دايمًا ع العيال
حواليكوا ناس كتير شمال
مبيعرفوش غير لابتنال
والأدب شيء م الخيال
مممكن ياثروا ع الولاد
والبياض يصبح سواد
وتلاقوا فرع ليكوا مال
خلوا بالكوا م العيال

لو فيه ولد جه وهور
أو كذب بكلام مزور
جاي بيقول محتاج فلوس
للكتب أو للدروس
ابحث ساعتها قوام ودور

ابقى دقق وابقى شوف
لو لاحظت في عينه خوف
حط نقطك ع الحروف

(٣)

اسأل عليه مفهانش كسوف
أساس الكذب كله خوف
لتصحي يوم متعرفوش
ساعتها يبقى اللوم عليك
لو لاقيت أسماء صحابه
متسمين أسماء غريبة
مش معروفة في أي بيئة
زي زبلة أو خرابة أو حريقة
اعرف ان أنت في مصيبة
ليكونوا دول سارقين دماغه
امشي وراه وشوف مسالكه
ليكون ماشي مع اللي هالكه
خلوا بالكوا من عيالكو

(٤)

ولو في يوم جه عينه حمرا
أو تحت عينه هالة سمرا
خلي عقلك ليك دليل
يمكن تكون أثار لخمرة
أو حشيش أو شيء بديل
ويده ليك إشارة حمرا
ولو لقيته بينام كتير
أو بيزعق في الكبير
أو لقيته ليكوا عاق
أو أخلاقه لا تطاق
اعرف الموضوع خطير
شارك عيالك مشاكلهم
متعرفش الشيطان ايه مخبلهم
شباب كتير ع الفيس مخدوع
ليكون الشيطان بيونسهم
وع الحرام بيأسسهم
ويعرفهم ع الممنوع

(٥)

وبدل ما تيجي في يوم تجني
تقول يا خسارة عليك يا بني
مكنتش أصدق يجي اليوم
وأشوفك يا بني بتتعبني
يابني دي مش أخلاقنا
في حد غريب جه وسرقنا
يا ريته جه على أموالنا
ولا كنش سرق عقل ولادنا

احنا في زمن ملىان ملاعين
شوف صحاب بناتك مين
ناس كتير ع الفيس شياطين
دا في شباب عاملين نساوين
عاملين لأي بنت كمين
يشوفوا أجمل جسم لمين؟
وهما ناقصين عقل ودين

(٦)

وبحسن نية بنات تنجر
والمصيبة يكون يوم حر
ويشيروها ع الملايين
شوف صحاب بناتك مين

علموهم معنى الدين
الدين يا عالم فيه تحصين
ضد بشر لابسين شياطين



يا بياعين الهوا

يا بياعين الهوا
يا بياعين لاشعار
حبيبي كان زيم
شغال في نفس الكار
باع لي في يوم الهوا
وشاغلني ليل ونهار
حط في قلبي النوى
وسقى النوى أشعار
طرح النوى من الهوى
عشق وقلب عمار
والقلب اللي كان مسجون
ومبني عليه أسوار
من كتر أخذ الدوا
من جرعة الاشعار
ساعتها حس بدفا
قام كسر الاسوار

(٢)

وقلبي سليل الصفا
راحلوا قوام وانكفى
وباح له بالأسرار
ساعتها حبيبي انتشى
وحقق الانتصار
بعديها لقيته اختلفى
وسابني سنين محترار
من كتر سنين الجفا
علمني معنى التار

يا بياعين الهوا
يا بياعين لاشعار
نفسى أكون زىكم
شغال في نفس الكار

(٣)

وابيع له نفس الهوى
واخلص معاه التار
واقوله كلام في العشق
يشغله ليل ونهار
واغلف كلامي غسل
وجوة العسل صبار
ولما يدمن كلامي
ح أختفي ورا الاسوار
ساعتها يمكن يحس
ان أنا وهو سوا
دقنا مرار الهوا
وعشنا في نفس النار
وزي ما انكويت انكوى
ودي أخرة لعب النار



بكرة العيد

صومنا خلاص التلاتين يوم
رمضان خلاص بيودعنا
عمري ما ح أنسى ولا يوم صوم
وازاي رمضان بيجمعنا
راح يوحشنا شرب الدوم
وشورية سخنة بتلسعنا
ما هي كانت المعدة بتقوم قوم
عمالة المعدة تسربعنا
وقمر الدين وزبيب بالكوم
وجرية ريقى بطشة توم
وطاجن بامية وكان مخدوم
وحلة كبيرة وفيها مبروم
والمكرونه غرقانة مفروم
شوفوا كام ساعة يا ناس محروم
وعمال بحسب باقي كام يوم

(٢)

وشفشق فيه التلج يعوم
كان عرقان ولساني بيزوم
وعيني ع الماية وواحدة الزوم
وأقول للماية آه يا هناكي
خايف التلج يسبح جواكي
نفسى التلج فيكي يدوم
وفرخة شاققها السيخ بتلف
ريحتها جميلة جاية تهف
من ساعتين كانت بتكاكي
وريقي م البص عقله بيخف
وتقول المعدة وراكي وراكي
والله يا حلوة ما أنا سيباكي
نفسى أتعامل يلا معاكي
انشاء الله آكل فيكي واحف
يلا يا مغرب خلص خف

(٣)

ولساني ع الشفة رايح جاي
والريق بيقول دا أنا ميت حي
حاكل الأكل ولو كان ني

وأمي تشوفني قاعد مكلوم
حاسة بيا ان أنا مظلوم
علشان أول مرة بصوم
تقولي قوم طب كمل نوم
ولما يأذن أقولك قوم

وأبص لأمي وأنا غضبان
عارفة يا بني انك عطشان
فات الكتير خليك طرزان
أمال لو كنت انت في أسوان
دا الحر شديد في نهار رمضان

وأرد عليها وأنا قرفان
بعد وسوسة الشيطان
من وراكوح أعمل قرصان
واشرب الكوز المليون
وامسح بقي وأقول عطشان

(٤)

رب الكون شايفك يا ضنايا
طب شيليلي حنة قنصايا
مش كل حاجة شيلها لبابايا
وتقوليلي شقيان يا ضنايا
طب كام النهاردة يا ماما رمضان
فاضل يومين ع العيد ويهل
بلاش ع الآخر تيجي تمل
خلي البركة علينا تحل
لما تكمل شهر الصوم
وما تحملتش ثلاثين يوم

رغم ان بابا مدلعنا
بس كان بيشجعنا
وبعد ما صمنا آخر يوم
فرحتنا كانت بنجاحنا

(٥)

وبكرة حايبقى عيد الصوم
تعبنا يارب ابقى سامحنا
بابا وماما تعبوا كمان
بعد التهجّد بالقرآن
وفرحتناين ويا فرحتنا

وساعدنا ناس صايمة في رمضان
خدمة لموائد الرحمن
ورضينا ضميرنا وارتحنا
وكل يوم نقرا القرآن
وكنا نصلي صلا بإمعان
وبعد صلاتنا سبّحنا

شهر الخير خلاص عدى
يا ريته استنى أو هدى
عشان تكثر حسناتنا
شهر مكنش فيه كوابيس
بعد ما اتحبسوا الأباليس
وطول رمضان نلعب ونهيص

(٦)

وكنّا بنلعب بالفوانيس
والفرح كان مالي حياتنا

ولما نلعب ونأخر – بابا ينده نسكر
ويقول حكاوي ولطائف
راح الخشاف والقطايف
واللمة كمان والمضايف
وضحكة حلوة وطرايف
طول الشهر ولياليه

شهر كريم بيجمعنا
ومشي خلاص ودمعنا
يارب يرجع بالعودة
ويرجع تاني يجمعنا

عارفين بكرة حايجصل ايه
بكرة حناكل كحك العيد
والصبح حنلبس لبس جديد
ما بكره أول يوم العيد
يارب كتر أعيادنا
يارب كتر أفراحنا



كلب لاغا قطة

كلب كان وصولي
خسيس ومش أصولي
بيدور على أي نطة
يحقق بيها أهدافه
والنطة عايزة محطة
توصله لأحلامه
فراح ملاغي قطة
يمكن ترفع مقامه
عمل عليها خطة
وبينلها هيامه
القطة كانت سانجة
مفيش بينهم قرابة
ساكنة في قصر عالي
وساكن هو في خرابة

(٢)

القطّة أساسها راقى
والكلب كان عشوائي
التي تسببه ع السفرة
ينفعله يكون بواقى

وبدا معاهها حيلته
عمل القطّة وسيلته
قال أما أضحك عليها
وأبقى من العلالي
ومالها يبقى مالي
واغسل معاهها سيرتي
وارتاح من الخرابّة
على الله تنفع حيلتي
وشاغلها بالربابة

(٣)

لكن الفرق بعيد
هي تنفع أميرة
وهو من العبيد
حوالين القصر ينبج
يمكن محاولة تنجح
ويقول محتاج لطله
يمكن تطلعه برة
ويحقق البعيد
عامل مغرم صبابا

وقعت القطه فيه
وعنيها بقت تجاريه
مالهاش يا عيني تجارب
والشغل شغل تعالب
وانشغل عقلها بيه

(٤)

قالولها دا مش توبك
والكلب دا من بيئة
ولايسوى تمن روبك
وأصوله كمان دنيئة
ازاي تتعلقى بيه

ح يعيش علىكي عالة
العيشة معاه استحالة
طب شوفي أكلك ايه
دا بياكل م الزبالة
وانتي سيمون فيميه
مفيش مقارنة بيه
مش ده اللي انتي تحبيه

(٥)

قالت ظالمينه ليه؟
انتوا والدنيا عليه
كان ممكن تبقوا مكانه
وساعتها برضه تعانوا
احساسكوا ساعتها ايه؟
نصيبي وخلص جاني
دا بيقولوا عليه دا أناني
ح يكون عليكى جاني
ولو هربتى معاه
القصر مش دخلاه
وانتى لوحده ح تعانى
قالت مصالحتي معاه
وكلامكم مش سمعاه
والقصر مانش دخلاه
وهربت فى لحظة معاه

(٦)

رمت العيلة طوبتها
والقصر مبقاش بيتها
وبقت الكلاب عزوتها
واتمنعوا يخشوا القصر
إلا لوحدها ندمانة
وتسيب الكلب لوحده
وترجع تاني إنسانة

وفشلت الخطة
والوش التاني ظهر
وبهدلها في الحنة
حست بقلبها انقهر
والأصل بتاعه ظهر

وحسنت بالجراح
م الكلام الحلو راح
والمطالبة بالصياح
اتمنت ساعتها الموت
والكلب أصبح حوت
وشغلها في البيوت

(٧)

والغرام قلب وقاحة
والكلام كلام إباحة
ما اتعودتش ف يوم عليه
والشتيمة بأعلى صوت
ولو نسيت لاصطباحة
يضربها بالشلوت
وبقى وكيل أعمالها
للخدمة في البيوت

كل يوم كارت في إيديها
مش ملزوم يصرف عليها
الشغل النهاردة في بيوت ذوات
والقصر ده مليون بهوات
يعني مياصة مع اشتغالات
خلي الرزق يجي ميات

(٨)

مدام أبوكي مش حاسس بينا
يبقى لازم تخدمينا
ان ما جيبته راعع لينا
يبوس إيدينا ويراضينا

دخلت قصر كأنه بتاعهم
فافتكرت اللي فات
من أول ما كانت في الروضة
والشغالين حوالها عشرات
وكانت بتلبس ع الموضة
لما يكون عندها سهرة
والضيوف كانوا باشوات
دلوقتي خدامة السهرة
ولبسوها كمان عبايات
داست على ديل عبايتها
في لحظة وقعت بالكاسات
حصل طرطشة على البهوات

(٩)

قالولها يا لمامة
بهدلتي هدومنا يا خدامة
مش قبل ما تجيبوها تعلموها
اللي زي دي متقدمش خدمات
دي تنضف ليكوا الحمامات

وهما بيشتموها .. ويهينوها
لقت قدامها أبوها
بصلها بذهول
وقال مش معقول
يا خسارة يا ميت ندامة
بنت الأصول خدامة

ورفعها بإيديه
والدمع مالي عنيه
وضمها في صدره
وبكوا مع بعضهم
والكل بينظر لهم

(١٠)

قالها ابكي
ابكي واغسلني الماضي
يمكن قلبي يكون راضي
عايز أحس إنك حزنتي
كسبتني ايه منه يا بنتي
بهدلتي لنا واتبهدلتي
والناس كمان مسكت سيرتي

د أنا ياما قابلته ورجيته
كان بيساومني يا بنتي عليكي
ولما تعبني كثير مشيته
كان فين عقلك قولي يا بنتي؟
قاللي كلام معسول فهوите
ومشيت ورا قلبي
وعقلي لاغيته
وياريتني ما شوفته ولا حبيته
مكنتش شوفت الذل في بيته

(١١)

ضحك عليا وكان كداب
أتاري الطبع يا بابا غلاب
والطبع يا بابا طبع كلاب
ياريتني قفلت في وشه الباب

أنا غلطانة يا بابا سامحني
بكاك يدبحني
ياريتني عرفت قيمة بيتنا
أسأت ليك وكمان لعيلتنا

وباست ايده وباست رجله
افتكرها زمان قاعدة على حجره
بيدلها ويغنيها ... القطة اللي سرقتنا

وراح متبسم لها
وقالها معلىش
يا ما ناس ليها
يجي ميت وش

(١٢)

منهم وش أمانة
أما الثاني غش
لو جاتله أمانة شوية
جواه ما بتعشش
غالب عليه الخيانة
يا خسارة اللي جرب مرة
والثانية متعلمش

ظمنها واتبسم لها
وراح مطبطب على خدها
حست أنها ارتاحت
غممة وانزاحت
ونامت على كتفه
حس بدموعها ساحت
قالها تجربة وراحت



سد انت بنيتة

حبيته ومش قادرة أخبي
وعنيا دايماً فضحاني
أملّي يجي يحس بقلبي
وعنيه تيجي تقوم حضناني

يا واحشني ومش حاسس بيا
نظرة منك تسعد قلبي
لو جيت يوم وناديت لعنيا
قلبي قبل عنيا يلبي

ياللي ناسيني ليه مخليني
أعيش في عذاب
حس بشوقي وبص عليا
قلبي يا روعي فاتح الباب

(٢)

هو حناني ليك مش واصل
ولا ترجمت الشوق في عنيا
بص في عيني عشان نتواصل
خلي قلبك يجري عليا
ليه يا حبيبي قلبك قاسي
ليه مش حاسس ليه باحساس
ليه معذبني كده وياك
هو عذابي بيرضي هواك
مش راح ألومك
راح ألوم قلبي
وأقوله ايه اللي جنيته
ياريت احساسك خبيته
عارف يا حبيبي لو أنا شايفاك
ح اقولك كلام يا ما داريته

(٣)

لو كنت أعرف طريقني معاك
مكنتش في يوم أنا خطيته
وأنت طريقك فيه أشواك
بسهم الغدر أنت رميته
أتاري جري عنيا وراك
بيرضي غرورك وهويته
وقلبي اللي عاش لوحده معاك
بورج جفاك أنت هديته
أتمنى قلبي في يوم ينسأك
مدام ولا مرة أنت جاريته
ولو حاولت في يوم ترجع
وعنيك جاية لعيني تركع
حتلاقي سد أنت بنيته



أمي

احمي يارب أمي وبارك
بوجودها يارب بنتبارك
دي أجمل حاجة في دنيتنا
وزينة البيت هي في بيتنا
يارب احفظها بجلالك

سعادتك ياما بتسعدنا
والبسمة في وشك يوم عيدنا
يا أجمل وردة في بستانك
كل اللي همك صحتنا
وصابرة علينا في شقاوتنا
وأجمل حاجة طولت بالك

يا واخدة الرحمة من ربي
وعلى الأخلاق كنت تربي
وزرعتي فينا أخلاقك

(٢)

لو تعبتي بداري
وتضحى عشنا وتخبي
رغم أنه باين في عنيني
ورغم تعبك بتلبي
وتقولي أزمة وهتعي

احمي يارب أمي وبارك
بوجودها يارب بمنتبارك
يا مدرسة لنا وجامعة

وتملي لنا في يوم جامعة
مش ح ننسى لمتك
ساعة الأكل تجمعي
وفي وسطينا تربعي
وتمدي ايديكي توزعي
وتبصي لنا بتشبعي

(٣)

ولو حد فينا في يوم سخن
نلاقيكي بسرعة تدمعي
ومتناميش وتسهرني
وطول الليل تفكري
ولو غفلتي تسكعي
وتقومي ماهوفة تشقري
لحد ما تظمني
وتصلي لربي وتشكري
وتدعي دايماً بالشفا

احمي يارب أمي وبارك
بوجودها يارب بنتبارك
والشكر لأبويأ أنه اختارك



اسمع مني

بلاش تسمع وتظلمني
وتصدق كلام اتقال عني
تعالى قابلني وكلمني
ولو ع الكلام اسمع مني
بلاش يا روعي تسمع عني
دا اللي بينقل عني كلام
غرضه أكيد تبعد عني
أنا اللي طول عمري بحبك
ودائمًا حريص أوي على ودك
عشان وشاية بتظلمني
كدة للعذاب بتسلمني
حتى العتاب منه حارمني
دا قلبي يوماتي بيعلمني
أخاف على شعورك دائمًا
لأن ألمك يألمني

(٢)

ولو في يوم جيت تسألني
قلبي كفيل يجيب عني
لأنه ملكك مش ملكي
وساحبني معاك كدة وأسرني
وهو ده اللي محزني
انك في لحظة بتظلمني

هو أنا قصرت في حنائي
علشان تصدق كدة فيا
ولو أنت ح تصدق فيا
تكذب الشوق في عنيا
وسهري وأنت بعيد عني
ولو شكّيت في إخلاصي
ح يبقّى شرخ كبير ليا
وأنت كدة ح تزعلني

(٣)

طب شوف الفرحة في عنيا
لما بقبالك يوم صدفة
أو كنت بتمر عليا
لو شوفت في عنيك البسمة
بيبقى أسعد يوم ليا
وطول الليل بفضل أغني
بلاش يا روعي تزعلني

ولو مش ح تيجي وتسالني
اسأل ضميرك طب عني
ح يقف في صفي ويلومك
عشان بتسمع لظنونك

نفسى تفكر بتأني
لو جيت في يوم قلت بحبك
يبقى كدة التعبير خاني
علشان بحبك دي شوية
احساسى أكبر م الكلمة
لكن بعبر بعنيا

(٤)

لو كانت حواسى بتتكلم
كانت عبرت أحسن مني
وكانت قالتك ايه شعوري
وأنت جاي وأنا مستني
بحس بقلبي متهني
ما حبك جوه عروق دمي
ولو بعدت عني في يوم
ساعتها الموت كدة أهون لي

ولو مرجعتش لضميرك
يبقى أنت كدة ح تزعلني
فكر يا روي بتأني
لوع الكلام اسمع مني
وبلاش يا روي تسمع عني



تن تن

ساعة الحيطه عمالة ترن
وعيني عليها وع التليفون مستني يرن
وقلبي معلق نفسه برنه
وكل ما يقلق أقوله استنى
أكيد حبيبي حاجة شغللاه
وعمره ما ينسى اللي بنيناه

والوقت بيـفـوت
وقلبي حاسس بيه حيموت
وساعة الحيطه عمالة ترن
ويقولـلي خلاص
هو حبيبي نسيني خلاص
وكل شوية يجي يسألني
امتى حيصحي حبيبي ويحن

(٢)

تن تن

عشر ليالي ما شوفت النوم
امتى ح يصحى ضميرك يوم
وتحس بقلبي ازاي محروم
ولو زعلان ارفع سماعتك يلا ولوم
يلا اتكلم دا أنا بتألم
ودينى صابر ع التليفون
وايدي فوقيه مستنى يرن
امتى يا روحى عليا تحن
توت توت
ليه مش سامع فى التليفون
غير نغمة توت
د أنا مشغولبك رد عليا
د أنا مشتاق أسمعك صوت
ليه تليفونك مات فى سكوت

(٣)

حد قالك عني حاجات
خلي الحب في قلبك مات
رد عليا انشاء الله تحط عليا شروط
وأنا ح أمضيلك مهما تقول
ولا بترد على المحمول
أوعى تقولي ما هش مشحون

قوللي يا روي
قوللي أنا مالك
قوللي مين غيرك حالك
جبت كل الزيرو عشائك
يمكن تيجي على واحدة ترد
فين الحب وفين حنائك
اللي حاسيته في كلامك
واللي قالوا في يوم لسانك

(٤)

زمان كنت بترد في ثواني
رد عليا فيه حد ثاني
خلاك تنساني
ولو فيه ثاني
حيديك حناني
أنت كدة بتهد كياني
أنا اللي قلبي عمره ما هانك
جاي تهينه وتسيبه يرن

تن تن

ساعة الحيلة عمالة ترن
وعيني عليها وع التليفون
مستني يرن
امتى يا روعي عليا تحن؟



وأنا مارر على ذكراكي

وأنا مارر على ذكراكي
جت بسمه ماسخة على وشي
وقلت والله ظلمني هواكي
ووقفت دمة على رمشي
والله قلبي ما حب سواكي
وأنت مُصرة أنك تمشي

وكل مرة أقول ح انسائي
ألاقي صورتك قدامي
وفيها ضحكة وبشاشة
وأول ما أقرب وأجري عليكي
ألاقي صورتك تتلاشى

(٢)

حتى صورتك

صورتك كانت تروي عطشي وتشبع
جوعِي

صورتك كانت جوه ضلوعي

وقلبي كان بيطل عليها

وساعة الضلعة كان يقيدك جوه
شموعي

وطول الليل يتأمل فيها

وانا من برة بداري دموعي

حتى دموعي

حتى دموعي كانت حيرانة جوة عنيا

قامت جفوني واخدة رموشي وقافلة عنيا

لتنزل دمعة في يوم تشوفيها

تشمتي فيا

(٣)

يا ما عنيا رمتك كلمة من حرفين
لو تتوزع كل اتنين حيعيشوا حبيبين
وانتي قساوتك منعت تفهم لغة العين
ليه عنيكى مأكرة
وبقت نأكرة
وساعة الجد تقولي مش فأكرة
امتى عنيكى حترجم عيني
وباخلاصي على ذكراكي

حتى لو ما رحمتي دموعي
وقولتي في يوم ما أضمنش رجوعي
لسة صورتك جوة ضلوعي
وحافضل أمر على ذكراك



بهية

بهية يا أم الشال لأخضر
سامعك بتنادي علينا
يا أم المسك مع العنبر
هلت روايحك حوالينا
يا أم خلخال من لؤلؤ
رجلك بتزهر أراضينا

أنا صوتك سامعه بينادي
خلوا بالكم يا ولادي
أنا شايقة حد بيخدكم
بلاش خلاف حضني يساعكم
اللي اشتراكم ح يبيعكم
لو حقق هدفه يا ولادي

(٢)

بهية بتقولنا فوقوا
أوعى حد ثاني يسيبني
الارهاب بيهددني
بلاش عتاب يا ولاد روقوا
خلافكوا ده بيعذبني
كلام بهية ده أنبني
ايدي في ايدك يا خويا نبني
من النهاردة مش أعاتبك
ولا أكذبك وتكذبني
وانسى الخلاف بيني وبينك
بهية بتقولنا فينك
أوعى تحوجني لغيرك
ولا أنت ولا هو تسيبني
كثر الخلاف بيعذبني
والخلاف حيدمركو

(٣)

كمان بتقول يا ولاد مالكو
هو أنتو مش واخدين بالكو
خلافكوا ح يضيع مالكو
تعالوا يا ولاد حواليا
معاكوا صورة يا ولاد ليا؟
بصوا كويس لملاحى
وشوف ملامحك وملامحو
شبهى تمام طالعين ليا
ولو أنتو رافضين تتسامحوا
ولا أنت ولا هو بهية
لازم تكون لأخوك رمح
ولو أنت عيش أخوك قمحه
دا أنتو من أرض عفية
وأنا حافضل عايشة بملاحى
وحافضل طول عمري صبية

(٤)

أصل انتوا مش عارفين قيمتي
دا أنا الحضارة وجسارة
ولو أنتو معايا حتكونوا زينتي
ماهي الطهارة من شيمتي
حتى الرسل واخدين بنتي
هاتيلهم يا دنيا أماره
ولا انتي غفلتي ونمتي

خليكوا يا ولاد حواليا
حضني يا ولاد حيساعكم
خلوني هدف بيجمعكم
ولا حد تاني يجي يخدعكم
ليمشي التاريخ ويودعكم
ساعتها ضيعتولي قيمتي



بستسمحك

لو الفراق حيرحك
والبعد حيليك سعيد
أنا برجوك واستسمحك
خليني أشوفك من بعيد
بستسمحك لو غيبت يوم
خليني في التاني ألمحك
ولو غيبت أكثر من يومين
يبقى أنت بتقول ح أدبحك
خليني أشوفك كأي
عابر للطريق
يمكن أطفئ الشوق
في قلبي من الحريق
خلي عنيأ تحصلك
وروحى تجري توصلك
تجري توسعلك طريق

(٢)

وحناني يجي يغرقتك
ويقولوا في الحب غريق
دي حواسي لسة بتعشقتك
وطول الليل تتنشقتك
لما العينين جت في العينين
والبسمة ظاهرة في نغزتين
والعشق في لمسة ايدين
والخجل لما ظهر ع الوجنتين
لما قولت ليك أنا بعشقتك

مش ح أسألك ايه مصدرك
ومين اللي قال عني كلام وحيرك؟
مين اللي غرضه يغيرك؟
وتنسى قلب بيعشقتك ويقدرك

(٣)

مش ح أسألك ليه الظنون
دا أنا ليا في رقبتك ديون
الحب والشوق في العيون
والسهر ويا النجوم
والهم من كتر الشجون
وحب مدهون بالجنون
بعد الحاجات دي في حاجة ممكن تريحك
دي عيوني كانت بالحنان بتسبحك

بستسمحك

سيبني المحك

(٤)

وحياة دمع عيني اللي جرا
وكل خد منه اتروى
وحياة مشاعري كلها
وحرقة قلبي اللي انكوى
وفي ركن بعيد راح وانزوى
ركن مجاريح الهوا
وحياة اللي كان بينا سوا
لو لمحتك يا نور عيوني
ابقى بطأ خطوتك
اكسير حياتي في طلتك
وسيبني أتأمل هيئتك
في مشيتك .. ضحكك
النعزتين في بسمتك

(٥)

ولو قابلتك مرة صدفة
افتكر كان ليك حبيب
أوعى تعاديه
عاش بيك وليك
كان روحوا فيك
ولسة عايش على أمل
ترجعوا تاني وتناديه
وأنا مش حاعتبك ولا أجرك
دا أنا لسة كنت بمدحك
مع كل مجاريح الهوا
بستسمحك
أنا نفسي أشوفك أو ألمحك



يا نجم

يا نجم ياللي في السما عالي
بلغ حبيبي كم سهرت من الليالي
وحذره يا نجم من الجفا ومن التعالي
واحكى له وذكره بالأيام الخوالي
أبلغه يا نجم عن سهري وشوقي ليالي
وقل له ان لم تبادله الشعور ولم تبالي
سيفل منك حبه اللي زوال

(٢)

وأن المحب مهما قبض على حبه
فإن الجفا يبدله من حال إلى حال
وأن الكرامة بين الحبيب والحبيب ملغية
لتوحد الأرواح والأجساد
وان لم يعود إلى قلبي مهرولاً
سأقسوا على قلبي ولن أشتكي
يا نجم إليك حالي



الطير الجارح

طير وقف ع الشباك
وأنا سهران من امبارح
قاللي يا عم ياللي هناك
أنا طير مانش جارح
ما تقوللي أنت ليه مهموم؟
أنا شايفك حزين سارح
قولتله مش قادر أصوم
عن شوق طيري الجارح
قاللي أكيد طيرك محروم
وحنانك ماهش فالج
قولت ازاى وأنا المظلوم
وساقيني الحنان مالج

(٢)

قال اديني أوصافها
وقولي فين أراضيهـا
في خلال أيام ح أعرفها
وأقولك تعمل ايه ليها
قولت أوعى تعرفها
ان أنا سهران بناجيهـا
لاحسن دي غاوية التقل
والتقل خصال فيهـا
قال متخافش يا صاحبي
حجيب سيرتك كدة صدفـة
وبتمثل انت ايه ليها؟

(٣)

وغاب الطير شهور وأيام
وأنا قاعد ومستني
وأنا سهران أيام ما بنام
مستني يجيب البشري
لحد ما ف يوم جاني كلام
شافوا الطير ماشي يغني
قعدت أدور عليه أيام
لحد ما لقيته متحني
قولتله نسيت وعدك ليا
وأنا مستني تيجي تهني
قاللي مش ح أقدر أساعدك
ده طير خاين ومتجني
وقال عليك كلام قاسي
أتاريك في وهم ومتغمي
أنا لو منك أنساها
ولا أفضل عمري مستني

(٤)

حسيت بكلامه مش مظبوط
وبدأت أربط خيط بخيوط
وسألت قالوا ده طير مفلوت
وبيخون سر أي بيوت
والطير ده كان ماشي معاها
وأنا قاعد قال ومستني
أتاريه شافها وغواها
وخذ سري وقام خني
وقال أكاذيب وسواها
وقال صفات بعيد عني
ان أنا كنت بتسلى
ولزقالي وبقت همي
وعمري ما كنت بهواها
لحد طيري ما طار مني
مع اللي خاني وغممني

(٥)

ليه يا طيري بتظلمني
ضحك عليكى وغواكى
ده أنا اللي كنت بهواكى
وكنت بتمنى رضاكى
شككتيني في كل الطير
وكرهتيني في شباكى
ولو كل الطيور حطت عندي
أنا عمري برضه ما حنساكى



محتار ما بين اتنين

ما بين قلبي وعقلي خلاف
وأنا تايه ما بين لاتنين
القلب نضيف أبيض شفاف
بسرعة يدق بنظرة عين
أما العقل له أهداف
عمله وفكره أهم اتنين
وأنا محتار ما بين لاتنين

وان قلت لعقلي بالراحة
وخذ قلبي بهوادة
يقوللي أقولك بصراحة
دلعتو ياما وبزيادة
ولو طاوخته مفيش راحه
ومفيش ورا القلب إفادة

(٢)

وكل يوم حاقوله كفاية
كفاية دق يا قلب بخاف
كل يوم تيجي برواية
ياما مشيننا يا قلب وراك
وأنت نظرة عين سحباك
عذبتنا كثير بكفاية
يا قلب جربناك مرة .. وتاني مرة
والذكريات كانت مرة
حنعيده يا قلب ليه تاني؟
حنرجع أنا وأنت نعاني
الفكر ليلاتي حيشغلني
وأنت اللي حتقول آه ياني
الحب متعرفش غباوته ولا قساوته

(٣)

رد القلب بهداوته
قال العقل مريض وسواس
مدقش الحب وحلاوته
ولا شاف الشوق في عين عشاق
بعد الخصام لما اتقابلوا
وعشان العقل لاغي الاحساس
كل اللي فاكره كلام الناس
وعذاب الحب وقساوته
دا أجمل حاجة بين الاحباب
ازاي تعيشه بحلاوته جنب شقاوته

(٤)

واحترت أكثر ما بين لاتنين
وسألت نفسي عن قلبي
هو الحب عرفه منين؟
لاقيت الخلاف كان سببه العين
بيعكس من برة لقلبي
شغال مع القلب مراية
لما بينقل غمزة عين
القلب يدبب جوايا
وعشان قلبي بريء شفاف
ملكش حق يا عقلي تخاف
عذاب الحب ده وشاية
وأنا مقدرش أكون خواف
ده الحب للقلب حماية

يخلي القلب في زعله يلين
لو حتى هديته بورداية
وأنا مع قلبي في نظرة عين
مدام موافق لهوايا



غالب أو مغلوب

غالب أو مغلوب
مبقتش أحسبها
الدنيا في أيدها كارت
حتجاذي بعدها
لعبت معانا لعبة
ورضينا بشرطها
الكارت فيه وشين
سعادة في وش الكارت
والضهر عكسها
لو جالك وش الكارت
الضهر يبرق لها
تقلب بسرعة الكارت
وتصدر حزنها

(٢)

حتى لو يوم ضحكنا .. وعيننا دمعت
نمسح دموع الضحكة .. ونقلق بعدها
اللهم اجعله خير
خائفين من غدرها
الحلو في طرف لسانها
والمر في حلقها
الحلو بسرعة يدوب
ويفضل مرها

والعشق لو مكتوب
ومالت لينا قلوب
في وسط سعادة الكارت
الكارت يقوم مقلوب
ويظهر عكسها
يطلع فينا عيوب
والغالب بقى مغلوب
وتفارق بعدها

(٣)

والله احترت معاهها
الدنيا جاية علينا
ولا بتحببنا
ممکن تسيبنا فترة
وفي لحظة تلمنا
لو جت وزهزت
ورضيت عننا
تسيبنا سنين وسنين
وفي لحظة تهدنا
تقتل في قلوبنا الفرحه
وتمرض جسمنا
تديك تورتاية جميلة
في آخرها سمننا
صعبان عليها نفرح
في آخر عمرنا

(٤)

لو قلت حرام يا دنيا
يا دنيا قدري
اديني المر قليل
وع الحلو ثبتي
تقول كان ليا شروط
ومدى صبرك على المشروط
يحدد جايزتي
ولو رافض لعبتي
اخرج من دنيتي

غالب أو مغلوب
مبقتش أحسبها
لا بقيت أخاف م الدنيا
ولا بحسب غدرها



الفهرس

٤	المقدمة
٥	يسقط يسقط حكم المرأة
١٧	كفاح العرب
٢١	فين دارنا ودوارنا
٤٥	دمعة في بير العبد
٥٠	خلوا بالكوا من عيالکوا
٥٦	يا بياعين الهوا
٥٩	بكرة العيد
٦٦	كلب لا غا قطة
٨٠	سد انت بنيته
٨٣	أمي
٨٧	اسمع مني
٩٢	تن تن
٩٦	وأنا مارر على ذکراکي
٩٩	بهية
١٠٣	بستسمحك
١٠٨	يا نجم
١٠٩	الطير الجارح
١١٤	محتار ما بين اتنين
١١٩	غالب أو مغلوب
١٢٣	الفهرس